

# OLE SULU SAMOA



=



OLE LUPE AVE FEAU FOI I MASINA  
TAITASI A LE  
**EKALESIA FAAPOTOPOTOGA KERISIANO  
I SAMOA**

NA AMATA SUSULU MA LELE MAI I LE 1839

E OO MAI NEI LAVA

I LE

SULU O TESEMA 2001

# FAASINO UPU

FAAMANUIAGA O LE KIRISIMASI	2
O LE LAUGA	3 - 4
ARETO MO LE FANAU	4 - 6
O SUAFA O LE ATUA	6 - 8
TAGI A LE PU-MATE	8 - 9
O E UA MALILIU	9 - 11
TAU LE TAVU E TATAU MO LE ATUA MANUMALO	12 - 13
O LE IUNIVESITE O KOROKOTA	13 - 14
MAFAUFAUGA MO LE AU LEOLEO	14
O LE KIRISIMASI	15
O LE FALETUSI MA LE FALELOMITUSI	16

## Faamanuiaga o le Kirisimasi



OLE FAAMANUIA  
AO TATOU  
SAVALIA LE TAU O  
FAAMOEMOEGA  
LELEI 2001 AUA  
LO TATOU  
FAAOLATAGA

*O le filemu i le lalolagi, ma lona finagalo alofa i tagata.*


*Ia manuia le alo atu o tagata uma o le EFKS e faamanatu le liutino o le faaolataga. Ia soifua mai o ia i o outou loto, ina ia to'ia a tatou feau i lona filemu.*

*Ia manuia le Ekalesia Faapotopotoga Kerisiano i Samoa ma ona tagata faatuatua uma i le lalolagi.*

*Ia ia te outou le Filemu o le Alii.*

*Soifua*

*E. Sulufa'iga Samasoni  
TAITAI FONONO O LE FONONO TELE*



**TUSI FEAGAIGA FOU: LUKA 2:21-35**

**MATUA: LUKA 2:29**

*Le Alii e, e te tuuina atu nei lau auauna ia alu ma le manuia, pei o lau afioga.*

**Autu: Loto Malie.**

*O le a ea le loto malie?  
Ao fea foi e maua ai?*

O le loto malie o le loto lea ua faatumuina i le fiasia, ina ua faataunuuina se mea sa naunau i ai. E masani ona tatou faalogo i le leitio i se tasi o pese a le au fatupese o faapea, "E te fiu e saili solo se mea e malie ai lou loto, i le lalolagi matagofie, o le aiga lava faatoa maua ai le loto malie."

E manaia ma sao nei faaupuga. Aua o le aiga o loo i ai Matua ma fanau, tuagane ma tuafafine, le mafutaga mafana faaleaiga, e ola faalagolago ai fanau i Matua, ae faamoemoe ai foi matua i fanau. E galo tiga ma faigata pe a maua le mafanafana o le mafutaga faaleaiga. O le mea lena e pele ma taua i soo se tasi lona aiga. E foliga mai la o le aiga e maua ai le loto malie. Ioe, peitai ua le sao foi i le taofi o nisi. Fai mai le autalavou o le ola tutoatasi e maua ai le loto malie. Ua avea suiga mai fafo, ma le atamai ua oo i ai fanau i nei ona po, ma mea ua fiasia ai, i lea olaga. E saoloto ai e fai soo se mea e manao ai, e aunoa ma se isi e faalavelave mai. Afai la o le ola tutoatasi le tali ae

faapefea le tala i le Uii faamaumau oa? O lona uiga la e le sao foi lea taofi? Sa manatu le Tupu o Solomona o le poto, o le mamalu, o le malosi, ma le tamaoiga, o le tali lea. Peitai ua iloa nei e leai, fai mai a ia, O mea uma o lenei lalolagi o ai a le matagi. E matua faatauvaavaa, faatauvaavaa, mea uma lava.

Fai mai le upu a le tasi miliona, "Sa ou manatu e mafai e le tele o tupe ona faatau le loto malie, ao lenei e leai." Fai mai foi le upu a le tasi foma'i o le mafaufau, "Na ou faapea o le tele o le poto, ao lenei na o le tiga o le loto. O le tele foi o lou iloa, ua saga tupu ai lou faanoanoa."

Afai la o lea le tulaga ua leiloa nei poo fea a maua ai le loto malie atoatoa. Ua uma le aiga, uma le ola tutoatasi, ma le tamaoiga, le malosi, le mamalu, ma le poto. Ao fea la e maua ai?

E leai lava se isi mea e saili i ai, na o le Atua lea. Lea sa moomoo faalupe o naumati i ai le toeaina o Simeona. Ua tagata matua ua gagaifgo foi le la o lona soifua.

Sa ia tatalo i le Atua ina ia faaumiina aso o lona soifua sei faataunuu lona manao.

Sa fetalai le Atua, "Simeona e le oo ia te oe le oti, sei muamua ona vaai ou miata i le Faaolataga." Na taunuu ea ona moomooga? Ioe, o le taimi lava na ia sapaia ai le pepe o Iesu i ona lima, na ia tepa ae ai i le lagi ma

alaga, Le Alii e, e te tuuina atu nei lava lau auauna, ia alu ma le manuia e pei o lau Afioga aua ua vaai e ou mata lau faaolataga.

E leai se isi e fia oti, ao lea ua manao i ai Simeona. Aisea?

Aua ua nʻalie atoatoa lona loto. Ua taunuu lona manao sa naunau i ai. Le Mesia ua leva ona valoia mai e le au perofeta i le Feagaiga Tuai. Le Tama o le faaolataga pei ona tatou sauni e faamanatuina lona soifua mai i le faaiuga o lenci masina. Sa puapuagatia, na faasatauroina na maliu, ae na toe tu mai i le tuugamau ma le oti, ina ia faamalieina o tatou tagata leaga, ma le agasala.

O Iesu e malie ai o tatou loto i mea lelei uma. Fai mai le Aposetolo o Paulo, Ou te le o toe ola au, ao Keriso o loo ola i totonu ia te au. O le loto malie lena o Paulo, ua le o toe fefe ai i se mea e tasi, e oo a i le oti. Ae faapefea i tatou? Ua faamalieina ea o ta tagata ia Keriso?

O loo tatou naunau e faamalieina lo tatou galala faaletino muamua, o mea e le tumau, o mea e mavae ae faamulimuli le Atua, o le mea e tumau. Fetalai Iesu, "Ia outou muai saili le Atua ma lana amiotonu ona faaopoopo atu ai lea o nisi mea e tele ia te outou."

O le Atua na liu tino tagata ia Iesu Keriso o ia lena e malie ai o tatou loto i mea lelei uma. Fai mai le matua - Le Alii e, e te tuuina atu nei lau auauna, ia alu ma le manuia, pei o lau Afioga.

Amene



*Tavita Anesone FT*



+++++  
ARETO MO LE  
+++++  
FANAU

(a) O LE TAMA LEOLEO MAMOE  
O PETELEEMA

**(Faitau 1 Samuelu 16:1-23)**

Sa tele lava tausaga sa auauna ai Saulo o le tupu. Sa le fiafia i ai le Atua ia te ia, peitai sa faatali pea le Atua sei aliali mai le tagata e tatau ai ma sa aoaina o ia seia oo ina aveeseina e Ia le malo mai ia Saulo. O ia aso uma sa tagi pea Samuelu mo Saulo aua sa alofa tele o ia ia te ia e pei sona atalii.

O le tasi aso, na fai atu ai le Alii ia Samuelu e uma ia lona tagi mo Saulo. Ua fai atu o Ia ia Samuelu, "Ua ou vaai e le o toe umi ona avea o ia ma tupu. Ona fai atu lea o le Atua ia Samuelu e alu i Peteleema e sue le tagata e igoa ia Iese. O se tasi o le fanau a Iese o ia lea o le a fai ma tupu e sosoo ai."

Na tau atu e Samuelu i tagata uma, o le a alu o ia e fai le taulaga ma fai talosaga ma tagata e latalata i Peteleema. E le i manao o ia ia iloa e Saulo o lea o le a alu o ia e sue se tupu-fou. Sa matua vaai lelei lava i le fanau a Iese, peitai e le i filifilia so i latou e le Atua. Na fesili atu o ia ia Iese, pe i ai se isi ona atalii?" Ona fai ane lea o Iese, o i ai le tama o lo o tausia mamoe i le fanua."

Ina ua aumaia ia Samuelu le tama e igoa ia Tavita, ona fai atu lea o le Alii, "O ia lea e

fai ma tupu". Peitai, o Tavita ua faatoa sefulu ma le lima ona tausaga. Na fetalai le Alii ia Samuelu e sasaa le suauu i luga o le ulu o le tama. O lenei faiga ua faaali mai ai o Tavita o le a auauna i le Atua, atonu o se perofeta taua po o se tagata tau. Na o Samuelu lava ua na iloa o le a avea Tavita ma tupu i le lumanai, ae na te le i taua lava lea mea i se tasi.

Ina ua tupu ae Tavita, sa faaalua i lona olaga o mea taua e tele. Sa tau o ia ma liona ma urosa sa osofaia ana mamoe. Sa poto tele o ia e faaaogaina maa e fai ai ana maata. O aso foi sa i ai o ia i le vao, sa aoaoina e ia le poto e ta le kitara ma laaupese, ma fai ana pese malie. Sa faatasi ma ia le agaga o le Atua.

Ua tuua e le agaga o le Atua ia Saulo. Sa matua faanoanoa tele lava Saulo, ma ua faia e ia o mea ua manatu ai tagata ia te ia, o ia o se tagata ua valea. O le mea e tasi sa faafiafia ai o ia, o pese ia.

O le tasi aso, na tau atu e se tasi tagata ia Saulo le malie o pese a Tavita. Na aumaia Tavita ia Saulo ma ta ai e ia ana pese ia te ia. Sa fiafia tele Saulo ia Tavita, ona avatu ai lea e ia se feau ia Tavita ina ia mafai ona la nonofo pea ma ia. Sa avea Tavita ma se tasi na te amoina mea tau a Saulo. Afai e alu Saulo i taua, e o laua ma Tavita na te amoina le pelu ma le talita a Saulo seia oo i le ituaso e manaomia ai ona faaaogaina.

Ua mavae ni nai aso, ua foliga mai ua toe lelei le ulu o Saulo, ona toe alu ai lea o Tavita i lona aiga, i Peteleema.

### MAFAUFAU ATILI:

Aisea ua le tofia ai loa e le Atua o Tavita e fai ma tupu?

(e) O LE TAUA OFOFOGIA A TAVITA,  
(Faitau - 1 Samuelu 17:1-54)

O aso uma lava sa avea ai Saulo ma tupu, sa tau ai o ia ma tagata Filisitia. Sa le mafai e ia ona tutulieseina i latou mai le nuu; aua o i latou o ni tagata malolosi.

E tele lava aso e tau fono ai se tasi sauai Filisitia toa e igoa ia Koliata e iva futu lona maualuga, o ona ofutau e ufitia ai lona tino atoa mai lona ulu e oo ifo i ona vae, e amo foi sana tao mamafa tele. O aso uma lava e valaau ai o ia ia Isaraelu e sau se isi la te tau. Peitai e oo lava ia Saulo e fefe o ia i lea tagata; aua o ia o se toa malosi tele.

Ina ua faalogo atu Tavita i le valaau mai o lea alii e pei e tau faifai i le autau a le Atua, na fai mai o ia, o le a alu atu sei la feiloai. Na iloa e Saulo o Tavita ua na o se tama leoleo mamoe, o lea na fai atu o ia, "E te le mafai ona faatoilalo lona sauai."

Na fai atu Tavita, "O le Alii sa fesoasoani ia te au, e fasi i liona ma urosa sa osofaia au mamoe, O Ia foi lea e fesoasoani mai e fasioti i lona tamaloa."

Sa faatuatua Tavita i le Atua. Sa i ai foi sana fuafuaga. Na savali atu o ia ia Koliata, e amoina lona tootoo leoleo mamoe. Ina ua vaai atu Koliata i lenei tamaitiiti o sau ia te ia ma se fasi laau i lona lima, na atq aamu o ia ia Tavita.



Na valaau atu Tavita ia Koliata, "E te sau ia te au ma le pelu ma le tao. Peitai ma te faatasi ma le Atua, e mafai e Ia ona laveai i ala e tele."

E le i faalatalata tele Tavita ia Koliata. Na oo loa lava ina ua feagai ai, ona tago ifo loa lea o ia i lana maa ta ma tuu se maa i ai. Na ia liai le maata ma le malosi tele ua i ai le maa, ona lele atu loa lea o le maa ua pa tonu lava i le va o mata o Koliata, ma ua lafotu ai o ia i lalo. Ona momoe atu loa lea o Tavita ua tago i le pelu a le sauai ua tipi ai lona ulu.

Ina ua vaaia e Filisitua lo latou sauai ua oti, ona latou sosola ese loa lea ma le faavavevave. Na tuliloa atu e le autau a Isaraelu, ma ua fasia le faitau afe ma afe o i latou. Na faasaoina e Tavita o Isaraelu mai o latou fili i si tamai maa laititi lava.

#### MAFAUFAU ATILI:

- O Tavita o se tama talavou loto tele.
- O le a se isi au tala e uiga ia Tavita?
- O ai lea ituaiga tagata?



F.S.S.

## O SUAFA O LE ATUA

#### (a) JEHOVAH TSIDKENU - O LE ALII LO TATOU AMIOTONU. (Ieremia 23:6).

O ona po o le maulalo tele o le amio a tagata o Isaraelu, na vavaloma ai Ieremia i lana valoaga lea ua taua mai ai le suafo lea o le Atua, ua faaalua ai ua uma aso o le faalagolago o Isaraelu ia latou o e latou te le

ilola le Atua. O se valoaga ua aumaia e Ieremia mo le nuu, ua oo mai ona po o le a asiasi mai lava ia i latou le Mesia mo le nuu, ua oo mai ona po o le a asiasi mai lava ia i latou le Mesia lava ia. O le mea lea na pei o se la oso i totonu o ia aso pogisa, le tau atu e Ieremia o lena suafo fou o le Atua. O le Alii la tatou amiotonu. O se folafolaga lea ua aumaia mo le nuu e uiga i Le o le a maliu mai na te faia alii ma tamaitai e tusa ma Lana amiotonu o se amiotonu e manuia ai le olaga. O le mea lea afai o le Atua e amiotonu, ua tatau ai foi ia i latou uma o e fiafia e saili ia te la, ona ola amiotonu. O le feau lea mo i tatou uma ua aumaia e lena suafo fou o le Atua, O LE ALII LA TATOU AMIOTONU.

#### (e) JEHOVAH SHAMMAH - O LO O AFIO AILE ALII.

I la tatou maimoaga i le faasologa o suafo o le Atua, ua tatou ilola ai, o se suafo tatau lelei lava lena e faaiuina ai le tala i le faaali mai o le Atua i le Feagaiga Tuai. E le aunoa ma se uiga taua le avea o le suafo O LO O AFIO AILE ALII, ma fuaiupu faaiu o le tusa a Esekielu. Na amata e Esekielu ona fai mai lana valoaga i ona po o le pe o le tai o le tafeaga a le nuu i Papeleonia. Ua leva ona goto le la o lo latou malosi, ma ua oo mai nei ona po. Na aliali ane ia Isaraelu se manatu, na laveaiina mai i latou mai Aikupito ina ia nofo pologa i Papeleonia. Ua fai mai le fai Salamo, sa latou nonofo ma fetagisi i vaitafe o Papeleonia ma mafaufau ai ia Siona (Salamo 137:1) ma ua tauau ina leai se manao moomoo ia Siona.

O lea tulaga faigata ua ootia ai le nuu, ua maua ai le avanoa e oo ane ai le Atua ia i latou e ala i le valoaga a le perofeta o

Esekielu, e tau atu ia i latou le mea moni e ao ona latou iloa, o a lava ni faigata o lo o tutu mai i le lumanai, ia aua lava nei galo ia i latou, o le Atua na aumaia i latou mai Aikupito, o la O LE ALII O LO O FAATASI MAI, e i ai pea faatasi ma i latou. O le a oo mai ea ia te oe se aso faigata? Loto tele. E afio ai iina le Alii.

Na tusi atu le tasi tulafale Atenai i lona lua o seneturi i le Emiperoa Hatiriana, e faapea, "O nei Kerisiano ua iloa lo latou Atua ma talitonu ia te la, ua nofo sauni e fetaiiai ma so o se mea lava latou te fetaiiai i lo latou auala; aua ua latou talitonu, so o se mea lava e oo ane ia i latou, o lo o i ai pea lo latou Atua faatasi ma i latou." Ua tumau pea ona pipii le au Kerisiano i tupulaga uma, i se upu moni faigofie, "Atonu tatou te le iloa po o le a le mea e oo mai i le lumanai, peitai, ua matou iloa Le na te uumauina le lumanai."

Afai lava e te fefe i le lumanai ma faaletonu pe i ai pe le i ai le Atua i aso, vaiaso, masina, ma tausaga o lumanai, ia e loto tele ma ia iloa le mea moni. O le mea o loo i ai nei o la, o le mea foi lena sa i ai o la, ma o le mea sa i ai o la, o le mea foi lena o loo i ai nei; ma o le mea sa i ai ma o lo o i ai, o le a i ai pea lava pea o la. E I AI PEA LE ATUA o le Alii o JEHOVAH SHAMMAH, e nofo sauni e faataunuu Ana folafolaga e faavavau.

(i) O LE SUAFA O IESU.

I le faasolo mai o le Sulu Samoa, sa tatou maimoaina ai le faaali mai o le Atua e ala i Ona suafa. E ui lava foi ina manino le gasolo mai o lea faaaliga o le ofoofogia o le manatu mai o le Atua i le tagata, ae le matua manino atoatoa lelei le faaali mai o le Atua o la lava o

le Atua moni. Ua manaomia tele se isi mea e sili atu mo i tatou ia tatou iloa loloto ai le fatu o le Atua.

O le a la lea mea sili ua manaomia mo se faaaliga atoatoa mai o le Atua? O se ola ia oo mai ia i tatou. O se ola paia na te aumaia se uiga fou taua o upu e mafai ona faaoga e faamatalaina ai le Atua, i ni auala fou tatou te manino lelei ai, e aunoa ma le faaletonu. O le mea lea na tupu i le liutino-tagata. Ua afio mai le Atua i le lalolagi e ala i le Peresona o Lona Alo na avea ma tagata ma ola o se tagata i se auala na faaaliga atoatoa ai le fatu o Lona Tama.

O le suafa na fuafuaina e le Atua mo Lona Atalii pe a oo mai i le lalolagi, o "Iesu". O le uiga o lea igoa, o Jehovah saves, po o le Alii e faaola". Ua tuu faatasia e lea igoa o uiga taua ma le silisili o le Atua i le tagata. O le suafa "Iesu" ua aumai ai le uiga o le Atua i se auala ua le pulea faamalosi e le Atua. I le Feagaiga Tuai, sa matua mafatia tele tagata e faia ni auala e faatino ai le Atua mamana. O suafa o le Atua na faaaliga mai ai o la i se faiga faapitoa, ae sa i ai pea le ata pogisa sa siomia ai fofoga o le Atua silisili ese. O Iesu ua iloa ai fofoga o le Atua. Afai la tatou te vaai i le Atua e ala ia Iesu, ua tatou iloa ai le Atua e le gata o le Mataisau silisili ese, ae sili atu foi, o la o le Faaola.

(o) O LONA SUAFA O LO TATOU IGOA LEA.

Ua tatou taunuu mai i le faaiuga o la tatou maimoaga i le faaali mai o le Atua lava la e ala i Ona Suafa eseese. Ua manaia tele le faaiuina o la tatou maimoaga i le faaupuga a



le tusi o Faaaliga 22:4, ua faapea mai: "Latou te vaavaai atu foi i Ona fofoga, e i ai foi i o latou muaulu Lona suafa."

Na tatou vaaia i lenei maimoaga le faaaliga manino mai o suafa o le Atua i ituaso faapitoa e feagai ai Lona Nuu ma le fia mauaina tele o se fesoasoani. O le fuaiupu muamua o le Tusi Paia na faaali mai ai le Atua i le igoa ELOHIM. O se igoa mamalu ma le silisili ese. a ua oo ina ua faia e la le tagata i Lona faatusa, ua na faaali mai o la e la lava i le suafa, Jehovah Elohim po o le Alii le Atua. O lea tulaga ua faaali mai ai ia i tatou le Atua ua pei ua fia avea ma tagata. O aso o le Feagaiga Tuai ua tatou vaaia ai le Atua ua faaali mai o la e ala i Ona suafa eseese, ae peitai ina ua oo mai le Feagaiga fou ua tatou iloa ai Lana faaaliga mulimuli o la lava, i le suafa Iesu o le suafa lea ua tatou iloa atoatoa lelei ai le Atua.

O lenei la, o le tualuga o la tatou maimoaga, ua faasinoina ai i tatou e le Agaga Paia i le mataupu mulimuli o le Tusi Paia i se upu moni e matua uiga ese lava e faapea. E i ai se aso ole a avea ai le Suafa o le Atua mo o tatou igoa. Sei mafaufau ae la i lenei tulaga. O le taimi lea e avea ai faamanuiaga uma o Lona suafa ma o tatou manuia faaolataga, faamaloloina, faamamaina, faapaiaina. Peitai i le ola e faavavau i le lagi, e le o ni manuia ia e aumaia ia i tatou, ae peitai, o ia faamanuiaga ua fai ma vaega o i tatou; aua a oo ina tatou vaai i le Atua ua pei ai lava i tatou o la. (Vaai 1 Ioane 3:2). "Le au pele e, o le fanau i tatou a le Atua i nei ona po, ae le faaaliga mai nei le uiga o i tatou a amuli; ua tatou iloa pe a faaali mai o la, ona foliga ai

lea o i tatou ia te la; aua tatou te iloa tino ai lava o la." O Lona uiga ua avea o la mo tatou, o Lona manumalo ua fai mo tatou, o Lona soifua e fai mo tatou ola, ma o le a la se isi mea o totoe? O Lona Suafa ua avea mo tatou igoa, e faavavau, faavavau lava. Amene.

V.T.



## Le Tagi A Le Pu-mate

O aga o le apitaogalu faatasi ma le ae o atigi figota atoa ma atigipupu i le matafaga, o le faaputuga lea o nai mea ninii e tutupu, e fanau mai ai le upu a le atunuu faasino i le "tagi a le pumate."

Aua fai mai, a ae ma taatia se atigi pupu, poo se atigi figota i le apitaogalu, poo lalo o laau i le matafaga, a tailia latou e le savili, ona maua lea o le leo, e pei ona faaigoaina, "o le tagi a pumate." O lenei leo, e faatatau lona tele poo le itiiti foi, i le fua o le savili, ua tailia e matagi.

O le itu taua i lenei aga o le siosiomaga, ua fatuina ai le muagagana, e faasino i le faiva o taologologo, o aga lava ia o faaoololomaau, pe logo malie, pe tafea foi i le au o savili, ao le leo e i ai lava, o le leo e tupu ai i liu matagi lelei.

Ua masani la tatou faitau i le tala ia Mose, ma mea na tutupu i lona olaga. E afua mai lava i lona fanau mai i ona po o le poloaiga a Farao, o lona tupu ae i le maota o le tupu Aikupito, o le taoto mai o se lumanai saogalemua i le malu

o Temukisa le augafaapae Aikupito, e ui lava i lenei manuia tele, ao lona loto, o lona toto ma ona ivi, ua se atigi poo se pupu, e le gugu, pe a taliaina e matagi.

A o i ai i le gasologa o lana lafitaga talu lona atumatagi i ni iu o lona ulavale i Aikupito, na la fetoi ai ma le faaaliga i le laau talatala. Na maofa lona loto, aua e le o le faasinoga lea e masani ai mea uma. Aua o le afi lava ia, o le folamua o le faaumatia. Ai o le talaaga lena o loo taoto i tua o le upu faaaloalo a Samoa, mo le afi, o le malaia. I le, e le o se vaaiga masani la lenei.

O le fia maimoa o Mose i lea mea, ua tatou vaai atu ai i le taoto mai o se faamoemoe tele, mo ia. Ao se faamoemoe foi e le tau ina faalogo i ai ma mafaufau ai. Afai o se vaega lea na ia ulavale ai i le maota o Farao, o lenei la ua malele le Alii le Atua mai i le laau talatala, ina toe foi iina. O lana galuega, o loo taoto i le mea na sola ese ai. Peiseai o loo faapea mai le faaaliga, o le a faaogaina nei lou inoino ia Aikupito, e fai ma faavae o lou alofa i le nuu o le Atua.

Ua tatou masani ma le tala lea (Esoto 3) ma ua tatou iloa foi, po o le a lava le malosi o lenei fetaiaga, a ua le mafai ona lilo le manatu, e peiseai ua faataatia e le Alii le Atua i luma o Mose se faatatau ma se moomooga, mo se faaolataga o lona nuu. Pe mata o le siufofoga mai i le laau talatala, ua se sau i liu o vaa na tutupu ai matagi, ona e peiseai e matafelefele le auga o le solaaga a Mose. E le gata ina fefe i lona tagata valeina o le Aikupito, ae i le isi itu, o lona fefe foi lea e fesoasoani i le puapuaga o lona nuu. A le o

lena foi, ai o se faaaliga lea ina ia iloa ai e Mose, e leai se moni i totonu o le alofa e na ona moomoo, ae le faatinoina. Ua tatou iloa lava le faatinoina. Ua tatou iloa lava le taavalevale o lenei siuleo i totonu o le tala o le faaolataga. Ua tatou iloa le tala i le lafitaga a le alii Tisepe ma le mau i le i ai o le Alii le Atua le agimalie ma le totoa. Ua tatou iloa foi le tofamanino e faatatau i le tali filemu, e solofua ai le tiga. Ao lea tatou te iloa, e ui lava ina e i ai se isi ituaso na leotele ai lesu, ma faaali lona mafatia i le sasa tuaiti ma le fulisia o fata faatau, ao le gasologa o lana galuega ma le anoanoai o ana feau, sa taiialalo lava le ia a sa Saumani, ma papai lana afioga i mea taitasi, i le leoitiiti ma le filemu. O le siufofoga lea e le mafai ona aveesea, e pei lava o le gagana na i le apita o galu. E faapena ni isi itu o lo tatou valaaulia ma le faaolataga, e le avaavau, ae tuumumusu mai pea.

la manuia.

ESS.

◉ E MALILILI



### FAALAVAAU FILIKI

Na soifua mai i le Aso 10 Ianuari, ae tuumalo i le Aso 13 Iulai 2001. Avea ma tagata Ekalesia i le Aso 3 Iulai 1980, ae tofia i le tofi Tiakono i le Aso 26 Mati 1981.

O lona toe sauniga i le Aso 20 Iulai 2001 i le Malumalu i Siufaga, sa taitai ai le Toeaina o le Pulega,



Susuga Tautiaga Senara ma ia saunia le Tatalo, o Misiperetiso Ivara (FS) sa lauga, o Kaisara Asiasiga (FS) o le Tusi Paia, ao au sa faia le molimau ma faaulufale le maliu, ma lona toe sauniga i luga o lona nofoaga tumau.

Molimau mo Faalavaau Filiki, sa feagai ma le faletua ia Nive ma le fanau.

Molimau foi le Komesina o Leoleo mo lona soifua tautua i le Matagaluega o Leoleo.

O Faalavaau Filiki o se tiakono e fiafia e auauauna i le Alii e ala i lona tofi tiakono.

Manuia le malaga.

*Rev. Opapo Soanai Oeti  
Siufaga/Falelatai.*



### **NANAI UPUSE TOLO LII SAUAGA TAGIILIMA:**

Tiakono Vailima. Fanau 12 Setema 1947, tiakono Ianuari 1980, maliu 28 Aokuso 2001. O le Tausitusi/Suetusi. O se auauauna aoga, faamaoni ma galue malosi i le galuega a le Ekalesia. E fetai lelei i ai le faalupega o tiakono, "o poutu toa o le galuega". Sa valaauina e le Fono Tele i nisi tausaga e ala i le kamupani suetusi o Betham Company e faamalamalama Tala o le Tupe a le Ekalesia.

Sa sii lona gasegase i Niu Sila ma toe foi mai ua tuai ona togafiti. O lona toe sauniga na faia e le Pulega Apia Sisifo. Taitai: E. Sulufaiga Samasoni FT (Taitaifono EFKS), faaulufale e Auva Peseta (Leufisa), Tatalo ma Faitau Tusi Paia Lale Peteru FS (Tanugamanono), Lauga Peteru Seiuli FS (Alaoa).

Na molimau le tina o Fofogafa, le pule o lana galuega o Oloipola T. Betham, Rev. Livigisitone Nuusila o le sui o aiga, ao Sina S. Young mo ona uso ma tuafafine. O au na molimau i lona soifua faaleagaga ma lana tautua lelei i lona Alii, ma ou faaii i lona oliolisaga tumau na faamavae atu ai, "Talofa uso e, tofaina oe."

Ia faamaise le Atua i le tina ma le fanau ma aiga faanoanoa.

### **Faitoaga Tolua FS**



### **TALA O ATENESI FAALILI LEAUPEPE**



Na soifua i le Aso 27 Fepuari, 1930 i Tufutafoe i Savaii. Na maliu i le Aso 30 Aperila, 2001 i Apia-Uta Vaivase-Uta.

Sa galue faa-teine tausimai pasi o le Malo o Samoa i Sisifo ao lei faaipoipo atu i le faifeau Apia o Faalili Leaupepe. Sa o la tausia le aulotu i Levi i Saleimoa ina ua iu mai Malua. Na toe tofia i laua e faiaoga i le Kolisi o Nuuausala, ma sa toe valaaulia i laua e tausia le Aulotu i Salua Manono mo le 20 tausaga. Na malolo mai ma toe valaauina i laua e le aulotu i Saipipi. O iina na filifilia ai i laua i le tofi Toeaina o le Pulega a Amoa.

Na mapu mai Atenesi i Apiauta i le tausaga 1987 ina ua maliu le Susuga i le Toeaina. Na aveese mai le tino maliu o Atenesi mai le fale maliu i le tusipa o le la i le Aso Sa ma matou lolotu i le matou lotu afiafi. O lea Sauniga sa taitaiina e le Toeaina Penisione o Ulutui Latali. O le lauga sa saunia e le Susuga ia Ieremia Leau F.F.A. O au sa saunia le tatalo.

O ona toe sauniga i le taeao o le Aso Gafua, o Siolo

Tauati sa taitai. Lauga le Susuga Livigisitone Peseta FM, o le Susuga ia Enefatu Lesa FS, sa tatalo. Na molimau le faifeau o Maluatafa Leaupepe e fai ma sui o le fanau a Atenesi, ae o le Susuga ia Sione Eli FM, ma Thelma Young na fai ma sui o le aiga, ae mulimuli i lau molimau. Sa ou taitaiina ona toe sauniga i le tuugamau.

O Atenesi o se tina faalototele faifeau ma e faamalosi-au mai mo le galuega a le Atua. O le tauloto masani a Atenesi i Aso Toonai i lana fanau, o le tutuli mai lea e tapena le fale o le faifeau ma fai mea uma e manao ai le faifeau ma lona aiga. Soo se taimi lava ma te manaomia ai se fesoasoani a le fanau, e le mafai ona faaletonu. E pele ia te ia le aufaigaluega a le Atua. O upu a Iesu lo tatou Alii. "Oi latou na tigaina ma mafatia ona o Ia, e le faailoga fesili lo latou tau i lelei mai ia te Ia."

Ia manuia lau malaga Atenesi.

*Rev. Siolo Tauati*  
**EFKS - APIA UTA.**



**AFIOGA MELEISEA MEAFOU. MELEISEA.**



O le alii tiakono o le EFKS Poutasi Falealili. Na soifua mai 17 Tesema 1933, ao le Aso 12 Iulai 2001 na tuua ai le malo e le afioga Meleisea Meafou ona o se gasegase faafuasei.

Na faaipoipo ia Rita Filemoni F Fatialofa (FT) 14 Ianuari 1956. E toa valu o la alo, ma fanau a le fanau e toaluasefulu ma le lua.

Na faauuina i lo la tofi Tiakono i le 1980. Ao le 1995 na filifilia ai e avea ma Tiakono Toeaina o le Matagaluega Falealili Sisifo seia oo mai ia Me 2001.

E tuua le malo e Meleisea Meafou, o ia o se sui o le Komisi o Suesuega o le Ola Faaleagaga o le Ekalesia (EFKS).

E maliu Meleisea o laei lava i laei o le tautua, aua o lona faiva alofilima lea, o le tautuaina o lona aiga, lona nuu, aemaise o lana Ekalesia. Ai lava se tauave pea ia te ia le fetalaiga a lo tatou Alii. "Faauta ou te vave alu atu, ia e taofi mau i le mea ua ia te oe, nei avea e se tasi lou pale." Amuia lea auauna e maua mai o loo faapea ona fai.

O ona toe sauniga sa faia lava i le malumalu o le EFKS i Poutasi. Sa taitai le Susuga Piliato Tuuau (FT), ao le Susuga Tautiaga Senara (FT) sa saunoa i se upu faamafanafana aua le tina ma le fanau, o le aiga foi le nuu ma le ekalesia.

E lasi molimau o le Soifuaga o Meleisea Meafou e pei ona molimauina e le tina Rita Meleisea Meafou, ma nisi o le fanau (Siusiupusi Noeline Timothy, Peniamina Meleisea, Asofaga Pululoa M Ah Kuoi). O le uso ia Tinomalu Milovale Sio sa fai ma sui o le aiga. O le susuga Tunumoso Iosia (Failautusi) sa molimau e fai ma sui o le Pulega Falealili, ao le afioga Anapu Aialii (Tiakono Toeaina) sa fai ma sui o le Matagaluega ao au sa molimau i lona soifua faale agaga.

Sa ou taitai i ona toe sauniga i lona oliolisaga tumau, ma o matou faatofa atu ai ia te ia i le pese a le au Kerisiano. Talofa uso e, tofaina oe.

O la le fai Salamo: "*E silisili i le manatu o le Alii le oti o ona tagata amio Atua*". (Ps. 116:15)

Tofa tama:

*Rev. Letone Uili.*



## TAU LE TAU A E TATAU MO LE ATUA MANUMALO.

I lenei tausaga 2001, ua tatou molimauina i le Aso 11 o Setema i Amerika, le matautia o faiga faale tagata ua mafua ai se mafatiaga e pei ona oo i ai Amerika faapea le lalolagi uma. Ua tatou matauina se matau ma se popole ona ua aafia le saogalemu o tagata lautele e le gata i totonu o Amerika ae faapea i soo i se itu o le lalolagi. E le galo foi le ata o le agalelei ma le alofa o e sa galulue ma faatino galuega fesoasoani mo e na aafia. Ua tatou matauina foi le agaga o le Malo o Amerika ma malo tetele o le lalolagi e sii taua i e na faatino nei agaleagaina ua maliliu ai le afe ma afe o tagata i New York, Washington ma Pennsylvania. O a ea ni mafaufauga o e talitonu i le Alofa o le Atua, e tusa ai o nei faaletagata matautia i le amataga o lenei seneturi?

I se lauga faamafanafana a le alii faifeau o Dr Robert Schuller o Garden Grove, California i Amerika, sa ia faasino i galuega alofa a alii ma tamaitai tineimu, alii ma tamaitai leoleo ma auauna uma a le Atua, e tali atu ai i le toatele ua fesili po o fea na i ai le Atua. Paga lea, na toatele le fuainumera o i latou na aapa atu o latou aao fia fesoasoani ae na faatamaia faatasi ma e na le sao mai i lea faalavelave matautia. Na faamanatu e Dr Schuller le Talalelei o le Alofa o le Atua e pei ona sa faaalua e i latou na tuu atu lo latou ola mo e puapuagatia. O le

manatu o Dr Schuller, o lenei mea na tupu i le Aso sefulu ma le tasi o Setema, o se faailoga lea o le Taua Tele o le lalolagi i le va o le faatuatua faa kerisiano o tagata ma o latou faalogona fefe i mea tau faamatau o loo lui mai ma manao e faavaivaia le faatuatua i le Atua Alofa.

O le talosaga a le alii faifeau o Robert Schuller, ia tulai Ekalesia Kerisiano o le lalolagi ma tau malosi i lenei taua. Ia sii i luga auupega o le Talalelei; ina ia faamalositia le faatuatua o tagata o lenei lalolagi i le Atua Alofa e toatasi. Sa apoapoai faapitoa foi le Alii faifeau i lona atunuu o Amerika, ina ia manatunatu i ona vaivaiga e tele i nei tausaga ua tuanai, aemaise o le va ma isi malo ma ana upufai na faaoo ai foi le oti i le toatele o tagata nuu o isi atunuu o le lalolagi. O lana talosaga i lona atunuu, ia toe iloilo tu ma aga, o upufai ma gaoioiga faale Malo ma le faa Amerika ina ia faatino le saolotoga moni e faavae i le Alofa o le Atua e le o le faale tagata. Na talosaga le faifeau i tagata uma ina ia toe faatauina le olaga tapuai i le Atua Alofa. Na faamanatu atu i lona atunuu o loo soifua pea le Faaola o le lalolagi, o Iesu keriso lea.

Ou te faafetai i manatu faalaeiau a Dr Schuller e faaaupegaina ai i tatou i nei vaitaimi o le taufaamanatau mai o le Fili ma ana vaegaau. Ou te faafetai ia Dr Schuller ma lana faamanatu mai i Ekalesia kerisiano uma ina ia tulai ma tau le Taua e tatau e faapei ona tusia. "Ua ou tau le taua lelei, ua iu ia te au le tausinioga (2 Timoteo 4:7). Ua

talafeagai ma onomea ai ona tatou pepese ma manatunatu i upu o la tatou Pese 168 o lo i le Tusi pese EFKS.

*O mai ia faamalosi ia tatou laei au. E tau ai mo Keriso Le taua e tatau. Ia tatou inoino i tu faapalaai. Ae tau faamalosi, mo le Faaola mai.*

*Ne'i mao faafiamalosi, vaaia ia Iesu. E aumai Lona Agaga e faamau ai tatou. Afai e famaoni ma tatou tutumau. E fai mo tatou pale le Ola Faavavau.*

O le siitau o le Malo o Amerika ma Malo tetele ole lalolagi ina ia tuliloa ma tineia le fili ma ana vaegaau, ia o tatou tatalo mo le toatele o tagata e ono faaumatia lo latou ola ona o le taua ua tau nei. Ia tatou tatalo foi mo Ekalesia kerisiano uma i le lalolagi ina ia faamalolosi e tau i le Taua e Tatau. Ia o tatou faaaoga ma le totoa auupega ole Talalelei ma talai atu, E MANUMALO PEA LE ALOFA O LE ATUA.

**Faapei ona tusia e Roma 89:37-39.**

Aua tatou te manumalo a'ia'i i nei mea uma lava, ona o Ia ua alofa mai ia te i tatou. Aua ua ou mautinoa, e le mafaia e le oti, po o le ola, po o agelu po o alii, po o e malolosi, po o mea i nei ona po, po o mea atali, po o mea maualuga, po o le loloto, po o se tasi mea na faia, e la mafaia e ia mea ona faateaeaina mai i tatou i le alofa o le Atua, o loo ia Keriso Iesu lo tatou Alii.

M.O.W.



## O LE IUNIVESITE O

### KOLOKOTA

Talu ai le ola fou taua uiga ese ua ootia ai le ola o Paulo, ua fai lea ma mea ua atili tupu ae ai i totonu ia te ia se faanaunauga fou i lona loto e pei ona ia faaalua mai e faapea, Na te fia iloa e sili atu i mea uma, Iesu Keriso ma le mana o Lona toetu. A o le mea moni ua uma ona iloa e Paulo o Iesu. O le a la le uiga o lona toe fia iloa atili? O le mea moni, o le uiga o lona manatu, po o le a lava le mea ua oo i ai lona iloa o Iesu, e i ai pea isi mea e tele e ao ona iloa. I nisi upu, e mafai foi ona faapea, e manao o ia na te fia iloa pe atili ma saga atili ona tele lona atili iloa o Ia. E le o le moomooga taua ea lea o so o se tagata faatuatua?

Ia Paulo lava ia, o lona lava manatu moni, o le iloa atili o Iesu e se tasi, e aafia ai le ulufale atu o le ola o le tagata itotonu o se poto masani loloto e le gata ilena mana toetu atoa ma Lona maliu puapuagatia! E le o se tagata Iutaia oti lea na te fia iloa atili, ao le toetu soifua mai o le Faaola o le lalolagi. Na toe tepa itua Paulo i aso o lona maelega valea, na la fetai ai ma Iesu i le ala i Tamaseka. O iina na ia lagona ai le faatauavaa tele o lona poto sese ma lona malosi faamaumau valea, ina ua oti ai lona tagata tuai ina ua ootia o ia i se feiloaiga tutasi faapito ma Iesu na maliu ma ua toetu.

O le mea lea ua tatou iloa i le fia iloa atili e Paulo o Iesu, e pei o lana faaliga i le Filipi 3:10. "Ina ia ou iloa o ia ma le mana o Lona



toetu mai, ma ia faatasi au i ona tiga; ona ua faatusaina au ia te ia i Lona maliu," ua tatou iloa ai i ia upu a Paulo lona muai iloa o Keriso na muai toeseina ai lona iloa tuai sa tuinanau i ai ma ola ai ma ua avea nei ma tagata fou ia Keriso i le taitaiga a le Agaga Paia. E ui lava la ina ua ia iloa ia mea uma, ae le uma ai lona fia iloa atilio Iesu, aemaise le olioli atili o lo o i ona luma, ina ia avea o ia o se tama ua maua lona tusi pasi mai le Iunivesite o Kolokota, tusa lava po o le a le taugata. Po o faapena ea foi ona e fia maua se tusi pasi mai lena Iunivesite?

O Kolokota na maliu ai Iesu i le satauro. O Kolokota na tanumia ai o Ia i le tuugamau ma o iina foi i Kolokota lava na toetu mai ai o Ia ua manumalo. O Kolokota lava, o le ata moni o le olaga o le Kerisiano ola tautua faamaoni. E ola auauna, faamaoni, tigaina, oti, tanumia, toetu mai, faamanuiaina. O le ala o le satauro e oo atu ai i le aiga, o le ala o le oti e oo atu ai i le ola, o le ala foi e agai i lalo e iu atu i luga. O le talalelei lena.

O Kolokota lava na faatino ai. Na alu ane ai. Na alu atu ai. Na alu ifo ai. Na alu ae ai i le faapaleina i le pale o le manumalo. O le nofoalii lea. Leai se Kolokota, Leai se manumalo. O le manuia lea e faavavau.

V.T.



## MAFAUFAUGA FAA LE AU LEOLEO

Tusi Faitau: Ioane 21:15-19

Manatu Autu: E TE ALOFA MONI I LE ATUA.

Ua tatou iloa alumaga o le fetaiiaiga nai le apitaogalu i le Vai o Tiperia. O taaga ma upu o ia ituaso, peiseai sa faamalumalu ai se faaeteetega tele, ona e fai o le matamuli o le au soo talu mea na tutupu ao lumanai le satauro, ao lea foi e le o iloa ona tulaga maopoopo mai o latou loto ma le faamoemoe mo le lumanai.


O le faaaliga la o Iesu i le auvai o Tiperia, o lonaseei faatasi ma i latou, ma le gasegase ole taumafataga na tatalaina ai o latou mata, o ni isi ia laasaga o le toe faamaopoopoina o loto ma le faamoemoe, o le au soo.

E loloto i le finagalo o Iesu, le itu na vaivai ai Peteru ma le au uso. O iina tonu foi lea ua afuafua ai le toe fotuaiina. E pei lava o fesili sautua tolu, o le uiga foi lea o lona moomooga. E le tau ina ia alofa, a ia alofa tele ma alofa moni. E le tau foi ina folafola o lea alofa, ae tatau lava ona alofa ai.

E ala ona faapena le manatu faale Au Leoleo i lenei vaiaso, ona ua pau lea o le alofa e fetai i le Alii, na o le alofa moni, ma le faamaoni atoatoa.

Ia fesoasoani mai le Agaga.....

E.S.S.





# O LE KIRISIMASI E AMATA MAI IA KERISO.



Luka 2:11: "Aua o le aso nei, ua fanau ai ia te outou i le aai a Tavita, le Faaola, o ia o Keriso le Alii."

Ua tatou toe aulia mai foi le Aso Kirisimasi. O se aso lea ua tatou faamanatu ai le oo mai o lo tatou Alii o Iesu Keriso i le lalolagi. O le feau lenei o le Kirisimasi, ua na o le tasi lava le auala e mafai ai ona maua le Atua, e maua lea ia Iesu le Pepe o Peteleema.

Ua taumafai nisi e saili le Atua i le natura, o i latou ia e tapuai i le natura. O nisi ua latou taumafai e sailile Atua i totonu o i latou; o i latou ia ua ifo ma tapuai ia i latou lava. O nisi foi ua taumafai e saili le Atua i faiaoga ma tagata popoto, o i latou ia ua ifo ma tapuai i tagata. Peitai afai e te fia sailia moni le Atua, e ao lava ina e matua taumafai e fesagai lelei ma Lona Alo, o Iesu Keriso. O Iesu o la o le faaaliga mai o le Atua; o la o le avanoa mai o le Atua; o la o le Alofa mai o le Atua. O Iesu o le faali tino mai lea o le Atua.

I se tasi Aso Kirisimasi, na alu ane ai se tasi fafine loto mafatia i se tasi falemai i Uelese. I lena falemai, sa i ai se ata o le fanau mai o Iesu na saunia e tamaitai tausimai o lena falemai. Na matua vaai lelei lenei fafine i fofoga o le pepe. I lena ituaso, na faamatala lelei e le Agaga Paia le uiga o lena ata. O le ata lea o le Kirisimasi. Mulimuli ane ua fai ifo o ia ia te ia lava, "Na ou vaai i fofoga o Iesu, ma ua ou maua ai le olioli e le mafai ona ou faamatalaina i ni upu." O aso nei ua matua avea lava lea tina ma kerisiano taua tele, ma ua na taitaiina le toatele o isi tagata e iloa lona Faola. O le mea lea, afai lava e te le i maua le Atua e mafai ona e maua nei o la. Vaai i fofoga o Iesu ma e ola ai.

Ua faapea mai le upu a se tasi alii suesue Tusi Paia, "O Iesu, o le isi lea suafa o le Atua. O le uiga o lana upu, o le mea moni, ua matua atoatoa lelei ia Iesu Keriso le mamalu, le matagofie ma le ofoofogia o le Peresona o le Atua; o le mea lea o le vaai lelei i fofoga o Iesu o lo tatou vaaia foi lea o le Atua moni.

IA MANUIA LAVA LE KIRISIMASI MA LE FAAIUGA  
O LENEI TAUSAGA 2001.

V.T.





## Fale Tusi Ma Le Fale Lomitusi



\* O loo tele tusi taua mo tamaiti o lo o faatau  
i le tatou Faletusi.

\* Maua tusi faamatala ai le uiga o faatuatua fou.

\* Maua tusi mo aoga faataitai.

\* Tele ate aoga mo tamaiti i aoga Maualalo.

\* Tele Tusi Faita, le Aganu'u Faa-Samoa,  
Faa-Faniano ma isi tusiga.

\* O lo o maua fo'i va tusi mo Eleiga a Tina.


\* E maua fo'i pelae e mafai fo'i ona oka i soo se size.

\* Mafai fo'i ona fai kopi i Salelologa ma le  
Ia Malamalama Bookshop.

\* E tautua fo'i e ala i Spiral Binding, Quick Book  
Binding, Stitching Binding.



\* Susu mai i le Ia Malamalama Bookshop ma Salelologa.



E-Mail: [maluapress@lesamoa.net](mailto:maluapress@lesamoa.net)